

**Kasinot qarasaasiatigoortuunngitsut aamma kasinot qarasaasiatigoortut pillugit  
Aningaasaqarnikkut Immikkut Ittumik aamma Nunani Tamalaani  
Pinerluuteqartarneq pillugu Naalagaaffiup eqqartuussissuserisuanut  
nalunaarutininik nassiussisarneq pillugu nalunaarut**

Pinnguaatit pillugit inatsimmi § 41, imm. 3 aamma § 60, imm. 2, tak. inatsimmik nalunaarut nr. 119, 22. januar 2016-imeersoq, aamma § 19, imm. 2, aamma pinnguaatit ilaat pillugit Kalaallit Nunaanni inatsimmi nr. 223, 22. marts 2011-imeersumi, inatsisikkut nr. 1574, 15. december 2015-imeersukkut allanngortinneqartumi § 46, imm. 2, naapertorlugit aamma inatsisunik atortitsinermut ministerimik isumaqatiginninniareernikkut, aalajangersarneqarpoq:

*Atuuffia*

§ 1. Nalunaarut una atuuppoq kasinonut qarasaasiatigoortuunngitsunut aamma kasinonut qarasaasiatigoortunut akuersissutinik pigisalinnut, pinnguaatit pillugit inatsimmi aamma pinnguaatit ilaat pillugit Kalaallit Nunaanni inatsimmi pineqartuni.

*Imm. 2.* Nalunaarut atuuppoq aningaasanik nuussinerit imaluunniit saaffiginninnerit pillugit nalunaarutini, aningaasanik nuussineq imaluunniit saaffiginninneq pillugu pasinnittoqartillugu imaluunniit aningaasatigut peqquserluutinik peqquserluutaajunnaarsitsinernut imaluunniit peqqarniisaarniartarnerit aningaasalersorneqartarnerannut attuumassuteqarsimasunik pasinnittoqartillugu, Aningaasaqarnikkut Immikkut Ittumik aamma Nunani Tamalaani Pinerluuteqartarneq pillugu Naalagaaffiup eqqartuussissuserisuanut nalunaarutigineqartunut, tak. pinnguaatit pillugit inatsimmi § 41, imm. 3 aamma pinnguaatit ilaat pillugit Kalaallit Nunaanni inatsimmi § 19, imm. 2.

*Digitalimik nassiussineq*

§ 2. § 1, imm. 2 naapertorlugu nalunaarutit digitalimik Aningaasaqarnikkut Immikkut Ittumik aamma Nunani Tamalaani Pinerluuteqartarneq pillugu Naalagaaffiup eqqartuussissuserisuanut nassiunneqartassapput.

*Imm. 2.* Nalunaarutit [www.hvidvask.dk](http://www.hvidvask.dk) aqqutigalugu nassiunneqartassapput Aningaasaqarnikkut Immikkut Ittumik aamma Nunani Tamalaani Pinerluuteqartarneq pillugu Naalagaaffiup eqqartuussissuserisuanik isumaqatigiissuteqareernikkut allatut nassiussisoqassangippat.

*Imm. 3.* Nalunaarutit imarissavai paasissutissat Aningaasaqarnikkut Immikkut Ittumik aamma Nunani Tamalaani Pinerluuteqartarneq pillugu Naalagaaffiup eqqartuussissuserisuanut nalunaarutininik nassiussisarneq pillugu nalunaarummi ilanngussa 1-imi nassuiaatigineqartut.

*Imm. 4.* Nalunaarutit [www.hvidvask.dk-mi](http://www.hvidvask.dk-mi) takutinneqartutut XML-formatinngorlugit tunniunneqartassapput.

§ 3. Akuersissummik pigisallit § 1, imm. 1-imi pineqartut, nalunaarummik il.il. digitalimik nassiussereernerminni, tak. § 2, ullup aningaaserivikkoortitsinerup kingulliup naannginnerani, nalunaarutit akuerineqarsimanersut akuerineqarsimannnginnersulluunniit misissortassavaat.

*Oqaatsit pillugit piumasagaat*

§ 4. Nalunaarutit, tak. § 1, imm. 2, danskisut tuluttulluunniit oqaasertalerneqarsimassapput, taamaattorli tak. imm. 2.

*Imm. 2.* Pinnguaatit ilaat pillugit Kalaallit Nunaanni inatsimmut tunngatillugu nalunaarutit, tak. § 1, imm. 2, danskisut tuluttulluunniit saniatigut kalaallisut oqaasertalerneqarsinnaapput.

*Digitalimik nalunaaruteqarsinnaajunnaarnerit*

§ 5. Nittartakkami [www.hvidvask.dk-mi](http://www.hvidvask.dk-mi) IT-kkut sivisuumik ajornartorsiuteqartoqartillugu XML-formatikkut nalunaarutiginninneq pissaaq e-mailimik allatulluunniit elektroniskiusumik tusagassiisarfimmik atuinnikkut Aningaasaqarnikkut Immikkut Ittumik aamma Nunani Tamalaani Pinerluuteqartarneq pillugu Naalagaaffiup eqqartuussissuserisuanik isumaqatigiissuteqareernikkut.

*Imm. 2.* IT-kkut sivisuumik ajornartorsiuteqarnermi, tak. imm. 1, pineqarpoq qarasaasiarsorsinnaajunnaarneq imaluunniit qarasaasiatigut pisinnaasat annikilligallarnerat il.il., kingunerallugu ulluinnarmi nal. 8 aamma 16 akornanni nal.ak. 8-ni ataavartumik [www.hvidvask.dk-mut](http://www.hvidvask.dk-mut) isersinnaannginneq. Uanili ilanngunneqanngillat annertusaaneq siunertaralugu pilersaarusiugaanngitsumik attaveerunnerit, nittartagaq sioqqullugu atuisunut ilimasaarutigineqareersut.

*Pillaaneq*

§ 6. §§ 2, 3 aamma 4 aamma § 5, imm. 1-imik piaaraluni mianersuaalliornikkuulluunniit unioqqutitsinerit akiliisitaanermik pillarneqaataassapput.

*Imm. 2.* Pillaasarnermik inatsimmi kapitalit 5-aanni malittarisassat malillugit ingerlatseqatigiiffiit il.il. (inatsisilerinermik piginnaatitaasut pisussaasullu) pillarneqarsinnaapput.

*Atuutilersitsineq*

§ 7. Nalunaarut atuutilersinneqarpoq ulloq 1. juli 2016.

*Akilerartarnermut ministereqarfik, ulloq 22. februar 2016*

KARSTEN LAURITZEN

/ Jeanette Rose Hansen